

**EARTH HOUR:  
DUNA NATURALES  
UN ORA DI BO TEMPO**



**WWW.SOLODIPUEBLO.COM**



**SOLODIPUEBLO@GMAIL.COM**

# MERVIN WYATT RAS PASANDO DEN PIJNBANK CU SCREENING Trahadornan di Bangaldesh ta cende un luz



# TURISTA(65) MASCULINO A FAYECE DEN LAMA



# CONTENTO DI TUR INVERSION Y PROYECTO HACI DEN CUIDO MEDICO

Early Warning System  
(EWS) a wordo inaugura:  
**DANKI NA E BON  
TRABOU DI GABINETE  
WEVER-CROES, AWE  
ARUBA TA UN PAIS BON  
PREPARA PA CUALKIER  
CALAMIDAD**

**SHAILINY TROMP-  
LEE Y ENDY CROES  
DEN PROGRAMA  
RADIAL "INTERES  
DI PUEBLO"  
DIASABRA AWOR**

radio Top FM 95 radio Top FM 95 radio Top FM 95 radio Top FM 95 radio Top FM 95

**SINTONISA**  
**INTERES**  
**DI PUEBLO**  
cu Joe Koolman

**DIASABRA 22 DI MAART**  
DI 11'OR DI MAINTA PA 1'OR DI MERDIA

Invitado  
**Endy Croes**  
hunto cu  
**Shailiny Tromp-Lee**



# EARTH HOUR: DUNA NATURALES A UN ORA DI BO TEMPO

Dia 22 di maart proximo, riba diasabra, miyones di hende, empresa y gobierno rond mundo ta participa na Earth Hour. Kico esaki ta nifica? E ta un accion cu ta encera paga e luznan pa un ora, pa asina dedica tempo un rato na conscientisacion di e importancia di nos naturalesa y con consumo di coriente, tin biaha innecesario, por afecta naturalesa y medio ambiente.

Den Caribe Hulandes tambe tin gruponan cu ta participando na Earth Hour. E orario cu esaki ta tuma lugar ta, 8:30 di anochi orario local. Na Aruba Directie Natuur en Milieu (DNM) tambe ta un di e participantenan cu lo paga luznan di e edificio situa na Uncle Louis Store na B. v/d Veen Zeppenfeld straat #7 na San Nicolas. Esaki ta un accion simbolico cu ta manda un señal na comunidad cu naturalesa ta bou di menasa di entre otro cambio di clima.

E iniciativa mundial aki, lansa na 2007 pa WWF, a bin ta crece tur aña y ta inspira hende pa haci un cambio positivo y duradero pa e planeta Tera. Wereld Natuur Fonds na Hulanda (WWF-NL) a acerca e gobiernonan y empresanan den Caribe Hulandes pa participa na Earth Hour. Hopi organisacion den region a confirma nan participacion. Entre otro: Directie Natuur & Milieu na Aruba, Tourism Corporation Bonaire y gobierno di Saba, ta paga e luz di nan edificio. Port St. Maarten lo desconecta e luznan no-esencial di e brug di Causeway. WWF-NL ta invita e comunidad local y otro organisacionnan pa nan tambe participa na Earth Hour. Ademá di pago di luznan, WWF ta pidi pa haci algo positivo pa mas cu 60 minuut na bienestar di nos mundo. Esaki por encera: come un cuminda vegetariano/vegan, haci mas na reciclahe, planta un mata y recoge sushedad. DNM na su turno

ta haci un yamada na nos comunidad pa haci uzo di e registro di mata cu tin riba e website di DNM. E datonan aki ta di importancia pa nos duna balor n'e importancia di existencia di matanan cu ta asina grandi cu mester clasifica esakinan como matanan monumental. Nan ta aporta pa añanan caba na combatimento di cambio di clima.

E participacion di e islanan den Caribe na Earth Hour ta muestra e dedicacion pa pone atencion na e consecucionan cu cambio di clima ta trece cu ne y cu dia pa dia nos ta sinti e efectonan mas y mas. Islanan chikito ta extra vulnerabel pa cambio di clima. Esakinan ta efectonan manera subida di nivel di lama y e keintamento di mundo. Debi na esakinan tin posibilidad di efectonan manera temperatura extremo, segura extremo, inundacionnan y horcan. Tur esaki tin impacto grandi riba economia di e



islanan, como tambe riba e bienestar y prosperidad di e naturalesa y su hendenan. DNM ta logra realisa e pago di luznan pa e dia aki y ademá di esaki nos edificio ta incorpora cambionan cu ta sostenibel. E airconan su temperatura ta regula despues cu oficina cera, cu ta 4:30 di atardi, asina ta evita mas consumo. E luznan tin un sistema automatico cu si no ta haci uzo di e espacio, e ta paga automaticamente.

Ta colecta e awa condensa di e airconan pa e sistema di flush WC pa asina evita uza awa potabel di calidad halto. Den nos espacio di oficina tin un 'greenwall' cu matanan cu ta yuda cu filtracion di aire. Esaki ta DNM su aporte na nos naturalesa y mundo. DNM ta spera cu comunidad di Aruba tambe bira activo y asina aporta na Earth Hour cu ta un iniciativa bon y un accion generoso cu ta encera solamente bo esfuerzo.

## Partido MEP:

# SHAILINY TROMP-LEE Y ENDY CROES DEN PROGRAMA RADIAL "INTERES DI PUEBLO" DIASABRA AWOR

Tur diasabra di 11or mainta pa 1or di merdia Joe Koolman ta hasi entrevista riba temanan actual via radio Top FM. Diasabra awor, 22 di maart lo tin como invitado parlamentarionan Shailiny Tromp-Lee y Endy Croes.

Durante e mainta aki, nan lo elabora riba e ultimo desaroyonan general na Aruba y den Parlamento. Shailiny Tromp-Lee lo elabora riba e celebracion grandi di nos Himno y Bandera y Endy Croes lo elabora riba e keho cu el'a entrega

na Ministerio Publico contra Mike Eman y riba e echo cu te dia di awe e no a ricibi contesta di Ministerio Publico. Tambe nan lo toca e tema di formacion di gobierno cu ta tardando asina tanto, y riba logronan importante di partido MEP den ultimo añanan.

Sintonisa e programa INTERÉS di PUEBLO diasabra awor 22 di maart, 11or mainta pa 1or di merdia via radio Top FM 95.1





# TURISTA(65) MASCULINO A FAYECE DEN LAMA



Boca Catalina/Tres Trapi - Diahuebs mainta pasa di 9'or y mey autoridadnan a wordo informa di un caso di hogamento na e lama di Boca Catalina.

Informacion oficial ta bisa cu un turista(65) Mericano a bira malo den lama. Esnan cu ne a splika cu e homber a cuminsa tosa, e lo tin problema di salud nan a bisa polis.



E turista no tawata reacciona mas y esnan cu a trece tera mesora a cuminsa cu CPR, wardando ambulance.

Paramediconan cu a yega a tuma over, pero ya mucho mas nos por a wordo haci.

A pidi pa dokter, unda cu dokter di polis Sra. Dr Pauline a presenta pa a



constata morto.

Aurora Funeral Home tawata esun encarga pa

hiba e curpa.

## Minister Maduro di Finansa ta informa:

# FITCH RATINGS TA HISA ARUBA SU RATING NA NIVEL DI INVERSION

Aruba ta conta awo cu 'investment ratings' cerca Fitch, Standard and Poor's y Moody's

Recientemente Minister Maduro di Finansa a wordo informa pa e compania di rating Fitch Ratings cu e rating di Aruba ta wordo hisa na nivel di inversion. Esaki ta un hopi bon noticia cu ta indica na inversionista y turista cu Aruba ta un Pais na unda nan inversion ta segura.

Tabata na comienso di februari 2025 cu ehecutivonan di Fitch

Ratings tabata na Aruba pa asina haci nan evaluacion financiero y economico di nos Pais pa cual nan a reuni cu diferente persona y instancia di interes. Entre nan a reuni tambe cu Minister Maduro di Finansa cu a repasa e trabounan cu Gabinete Wever-Croes a bin ta haci pa stabilisa Aruba despues di e pandemia. E mandatario a splica tambe mas di e maneho

financiero hiba pa mehora nos finansa publico pa logra laga atras deficit presupuestario y crea espacio fiscal den surplus pa por reduci debe, haci inversion necesario y crea un buffer pa por enfrenta retonan financiero cu por surgi.

Ta importante pa menciona cu awor tres diferente compania di rating ta califica Aruba

como un Pais na unda nan inversion ta segura. "Danki na e trabou haci den ekipo, un maneho financiero prudente y eficaz, awe nos por ta orguyoso cu Aruba ta goza di un 'investment rating' cerca tres companianan di rating, Fitch Ratings, Standard and Poors y Moody's," ta palabranan expresa pa Minister Maduro di Finansa, cu ta hopi gradici na su ekipo di trabou pa e

### RATING ACTION COMMENTARY

## Fitch Upgrades Aruba to 'BBB-'; Outlook Remains Positive

Tue 11 Mar, 2025 - 11:21 ET



Fitch Ratings - New York - 11 Mar 2025: Fitch Ratings has upgraded Aruba's Long-Term Foreign-Currency Issuer Default Rating (IDR) to 'BBB-' from 'BB+'. The Rating Outlook remains Positive.

resultado importante aki na bienestar di Pais Aruba.



# Prome Minister Evelyn Wever-Croes: Early Warning System (EWS) a wordo inaugura: **DANKI NA E BON TRABOU DI GABINETE WEVER-CROES, AWE ARUBA TA UN PAIS BON PREPARA PA CUALKIER CALAMIDAD** Un proyecto financia cu fondo di Union Europeo



Diahuebs mainta 20 di maart, Prome Minister Evelyn Wever-Croes tabata presente na e inauguracion di e Early Warning System (EWS), e sistema cu ta duna alerta ora ta trata di calamidad natural cu por wordo detecta di trempan. E sirenanan cu ta poni rond di Aruba ta duna e prome señal na esnan cu ta den e areanan di peligro.

Prome Minister a expresa di ta sumamente contento di por tabata parti di e inauguracion aki, mirando cu na momento cu el a drenta gobernacion a haya un Bureau Rampenbestrijding cu no tabata haya e debido atencion di gobierno. Aki ta unda señor Rino Hermans a convence Prome Minister

mesora cu mester pone atencion na e tema di "Ta bon prepara".

Tambe Prome Minister a indica cu el a atende varios conferencia, encuentronan y seminarionan den Reino y na Nacionnan Uni, y e tarea number un cu bo ta siña ta cu na momento un calamidad dal, pa por recupera mas liher y bay bek na normalidad, bo mester ta bon prepara.

E proyecto aki a wordo financia cu fondo di Union Europeo. Prome Minister te cu awor ainda ta Presidente di Overseas Countries and Territories Associations (OCTA), cu ta paisnan ultramar cu tin un relacion cu Union Europeo, pa asina accesa fondo. Prome Minister a splica cu su persona y señor Ady Thijsen na Hulanda como presidente di e comision ehecutivo ta lucha hopi duro pa por logra pa islanan manera Aruba haya mas fondo.

Tambe Prome Minister a indica cu institutonnan na Aruba mester aplica pa e fondonan cu ta wordo ricibi di Union Europeo. E ta un proceso un poco complica pero e ta necesario mirando cu e fondonan aki ta yuda pa por cumpli cu e proyectonan importante pa pais Aruba manera esaki.

"Finalmente, pasando e



antorcha pa e gobierno nobo, mi ta bay cu un curason trankil y un orguyo grandisimo di ta lagando atras un Crisis Management Office (CMO) bon prepara. Mi ta hopi orguyoso di señor Hermans y su ekipo completo pa tur e trabou duro cu nan a bin ta eherciendo y mi ta

deseanan hopi exito. Nos a demostra cu como pais chikito nos por logra hopi si nos ta uni. Pami e ta un honor di por a contribui na empoderanan y enforsa na haci e fundeshi mas fuerte pa nan por sigui yuda Aruba bay padilanti", Prome Minister a indica.



Prome Minister Evelyn Wever-Croes:

Aruba y Merca tin un relacion hopi estrecho y ta importante pa mantene asina

PROME MINISTER A REUNI CU CONSUL GENERAL DI MERCA PA ARUBA

Den number di Gobierno Mericano a gradici Prome Minister pa e bon cooperacion durante e añanan di su gobernacion



Diaranson 19 di maart, Prome Minister Evelyn Wever-Croes, hunto cu Minister di Husticia, Minister Rocco Tjon a reuni cu Consul General di Merca pa Aruba, señor Ramon Negron, cu ta situa na Corsou.

Prome Minister ta splica cu Merca ta e pais cu ken Aruba tin e relacion mas importante pa loke ta trata nos desaroyo economico, nos turismo pero tambe pa siguridad. E consul a bin pa e celebracion di Himno y Bandera y tambe tawata presente na e recepcion na honor di tur consul na Aruba dia 17 di maart.

Migracion Venezuela Durante e reunion diaranson mainta a trata diferente tema pero e principal ta e tema di

Migracion cu pa Merca ta un tema delicado y cu na Aruba ta sinti su efectonan di cerca. E situacion na Venezuela ta sigui delicado y Aruba ta hopi cerca di Venezuela y e impacto cu e migracion di Venezuela tin riba Aruba ta algo cu semper a keda bin dilanti durante reunionnan cu Merca pa asina por maneha esaki na e miho manera posibel.

Siguridad Durante e reunion tambe a papia riba oportunidadnan economico, enseñanza y siguridad. Aruba ta un partner importante pa Merca den mantene e region aki sigur. Aruba na varios ocasion ta intercepta contrabando entre otro di droga y arma den awanan di Aruba. Esaki ta yuda mantene nos

region mas safe evitando cu e contrabando ta yega e destino, por ehempel Merca. Tur esaki ta haci cu Aruba y Merca tin un relacion hopi estrecho y ta importante pa mantene esaki asina.

Prome Minister: “A trata di un bon reunion unda e consul den number di Gobierno Mericano a gradicimi pa e bon cooperacion durante e 7 aña y mey di mi gobernacion. Semper mi a coopera cu nan ora cu nan a rekeri di mi atencion y semper mi a tuma tur tema na serio. Di mi banda mi tambe a gradici’e pa nan cooperacion durante e añanan y nos a keda di acuerdo pa sigui mantene e bon lasonan den beneficio di pais Aruba”.



Corte di Prome Instancia 21 maart 2025

Horario	Sospechoso	Acto Castigabel
08.30	L.A.R.T. K.A.D. D.E.R.A. R.F.D.P.	E sospechosonan ta wordo acusa di a viola ley di droga den eperiodo di prome di juli 2024 te 20 di augustus 2024.

Corte di Prome Instancia 27 maart 2025

Horario	Sospechoso	Acto Castigabel
08.30	S.M.H. P.P.H.	H. y H. ta wordo acusa di ladronicia cu violencia contra un persona di cen y telefon riba 17 di maart 2023. E violencia a encera cu nan a pone pistool na e persona su cabez y cuchio na su pecho, a menaze y a coba den su saconan di carson riba e fecha menciona. Nan ta wordo acusa di ladronicia cu violencia contra un persona riba 2 di september 2023. E violencia a encera cu nan a pone cuchio na nek di un persona y a menaze, a punta pistool riba dje y e ranca cadena for di su nek. Nan ta wordo acusa di heling y labamento di placa den e periodo di 2 pa 8 di september 2023 y di posesion di un arma di candela riba 3 di september 2023.
10.10	B.E.H.	H. ta wordo acusa di, como chofer di un auto y mientras e tabata bao influencia di alcohol riba 11 di oktober 2023, a causa un accidente di trafico riba L.G. Smith Boulevard, caminda el a keda sin duna preferencia na un motocicleta y a bin un dalmento den cual un persona a bin na fayece riba 15 di oktober 2023 y e otro persona a sufri lesion fisico hopi grave.
13.30	E.D.C.	C. ta wordo acusa di kiebro y ladronicia den un cas di cen di un persona den e periodo di 17 pa 21 di juni 2024. Tambe di destruccion di algun obheto den e mes cas aki riba 21 di juni 2024.
14.00	Z.E.M.	M. ta wordo acusa di ladronicia di un auto riba 9 di september 2024.
14.20	H.B.H. D.J.O’N.R.	H. y R. ta wordo acusa di kiebro y ladronicia den un cas di un aircro den e periodo di 8 pa 15 di juni 2024.
14.50	J.L.C.V.	C.V. ta wordo acusa di a maltrata un persona riba 2 di juni 2024, dor di dal y scop e varios biaha na su curpa.
15.15	E.J.M.H.	H. ta wordo acusa di posesion di cocaine riba 16 di augustus 2024.
15.45	N.D.O.C.	O.C. ta wordo acusa di e maltrata un persona riba 28 di juni 2024, dor di dal e un wanta den cara.



# Prome Minister Evelyn Wever-Croes: Den su discurso durante Acto Protocolar, **PROME MINISTER A EXPRESA SU ADMIRACION PA E MANERA CU MUCHANAN TA CELEBRA DIA DI HIMNO Y BANDERA**

**“Danki na tur educador pa semper inculca e amor pa Aruba den curason di nos muchanan”**



Diamars mainta a tuma  
luga e Acto Protocolar di



e celebracion di Dia di  
Himno y Bandera. Prome  
Minister Evelyn Wever-  
Croes durante su discurso  
a papia riba diferente  
tema. Un tema a trata  
di su admiracion pa e  
muchanan di Aruba en  
cuanto celebracion di Dia  
di Himno y Bandera.

Prome Minister a indica  
durante su discurso cu  
desde cuminsamento di e  
luna aki por a sinti caba  
e vibracion pa loke ta e  
celebracion di nos Dia  
Nacional. Por ehempel

e festivalnan di canto y  
poësia cu composicionnan  
y interpretacionnan  
sumamente bunita  
reflehando e amor pa nos  
pais; e ferianan cultural  
rond di henter nos isla; e  
marcha cultural di Colegio  
Pastoor Kranwinkel na  
Paradera siman pasa  
diabierna; e Manifestacion  
Cultural na Plaza Betico  
Croes cu un explosion di  
creatividad, innovacion y  
amor pa nos patria.

“Den nomber di Gobierno  
di Aruba mi ta gradici  
tur esnan cu a hasi tur  
e eventonan aki asina  
exitoso. Den nomber di  
pueblo di Aruba mi kier  
expresa un danki special na  
nos maestro- y maestranan  
pa e forma con nan ta  
prepara nos alumnonan  
y celebra cu nan, nos  
Himno y nos Bandera.  
E aña aki mi tabata tin  
e honor di bishita varios  
scol atrobe, y e recepcion  
tabata hopi caluroso. E  
parti mas special ta keda,  
na momento cu mi mira  
tur e alumnonan di scol,  
para hunto y uni dilanti  
nan scol. Y riba nan cara  
expresion di inocencia,  
entusiasmo y speransa,  
hisando e bandera y  
cantando e himno, “uit  
volle borst”, manera na  
Prinses Amalia School  
siman pasa.



Danki pa sigui inculca den  
curason di nos muchanan,  
e amor pa nos Himno,  
nos Bandera y nos dushi  
Aruba. Asina, unda cu  
nan bai riba mundo, nan  
lo ta un embahador di

Aruba, y representa Aruba  
dignamente. E ora nos por  
ta trankil, cu ora yega nan  
turno, nan lo cuida y stima  
e pida baranca aki, mes of  
mas hopi cu nos ta stim’e  
y ta traha p’e”, Prome  
Minister a expresa.



## Parlamentario Endy Croes (MEP):

# MERVIN WYATT RAS PASANDO DEN PIJNBANK CU SCREENING

## Trahadornan di Bangaldesh ta cende un luz

Parlamentario Endy Croes ta splica cu tin varios candidatonan pa minister di AVP pasando den pijnbank pa cu screening. Mervin Wyatt Ras ta uno pero tambe Dowers y De Meza y lo amplia riba e dos ultimonan aki den un otro artikel.

### Ley di screening ta uno basta profundo

Manera nos sa e ley di screening ta uno cu ta bay basta profundo pa asina garantisa cu esnan cu pasa e screening a pasa door di varios investigacion. Nos ta papia aki di entre otro investigacion hudicial unda ta investiga si tin un of mas keho entrega contra e persona en cuestion y veiligheidsdienst ta mira kico bo a yega di haci y cu ken bo ta anda. Bo tin tambe e investigacion di belastingdienst ariba

di bo comportacion di belasting, si abo y otro miembronan di famia ta cumpli debidamente cu pagonan di belasting. Ademas, FIU ta mira tambe ongebruikelijke transacties. Esaki ta nifica cu nan ta investiga transaccionnan inusual cu lo por tin di haber cu labamento di placa of financiamiento di terrorismo. Esaki ta algun di e investigacionnan cu ta wordo haci riba cada persona cu ta postula su mes como posibel Minister. Esaki na final ta pa garantisa cu Aruba por tin e confiansa cu esnan cu bira minister ta hendenan confiabel cu por traha pa e interes general di pais y no pa interes personal of pa fix ottronan. E ley aki tambe ta sera e porta y ta garantisa cu ex ministernan di AVP manera Paul Croes

y Benny Sevinger hamas por bira minister bek na e pais aki. Pues no por ripiti e corrupcion y estafa cu miembronan di AVP a haci pa enrikece nan mes riba custia di pueblo nunca pero nunca mas.

### Mervin Wyatt Ras den problema?

Aparentemente, segun informacion veredicto cu varios candidato di AVP ta confrontando problema serio cu screening. Nombenan di Mervin Wyatt Ras pero tambe di Mike de Meza, Arthur Dowers y su casa Patricia Dowers ta esnan cu mas frecuente ta coren den wandelgangen. Mervin Wyatt Ras nos ta corda cu algun aña atras a sali un articulo den prensa cu un ciudadano a keha y reclama contra su persona como cu Mervin y/of

conocir aparentemente lo ta haci areglonan cu nan contactonan pa hende di Bangladesh bini Aruba como "live in" pues pa biba y traha na cas di varios famia. Na e manera cu esaki tabata tuma lugar aparentemente e por tin raakvlakken cu mensenhandel y mensensmokkel cual ta castigabel pa ley. Un persona hopi conoci den comunidad a trece e reclamonan aki dilanti. Alabes ta conoci cu Mervin ta casa cu un comerciante hopi grandi kende tin varios negoshi y aki tambe wandelgangen ta papia cu tin problema kisas hasta cu belasting of e forma con e estructura di varios di e negoshinan aki ta hinca den otro pa kisas posiblemente scapa di paga belasting na pais Aruba.



Un cos ta sigur cu screening lo saca afor varios puito for di e macuto. Nos sa tambe cu varios candidatonan pa minister di AVP incluyendo Mike Eman no ta drumiendo mucho trankil cu henter e situacion aki. Keda pendiente paso nos lo bay amplia tambe dentro di poco riba e screening di Mike De Meza y Arthur & Patricia Dowers. Kico ta pasando? Mas di 3 luna pa forma un gobierno? Boso forma pa caba!

## ARUBA BANK INTRODUCES SENTOO.ME FOR PERSON-TO-PERSON (PEER-TO-PEER) PAYMENTS



March 20, 2025 – Aruba Bank is pleased to announce the introduction of Sentoo.me. Sentoo.me is an innovative, easy, and secure way to request and receive money from another person—making peer-to-peer payments direct and instant. Aruba Bank customers can now link their bank accounts directly to the Sentoo.me App. Every transaction is

confirmed through the Aruba Bank App, ensuring a smooth and secure approval process without the need to manually enter bank account details. Whether you need to get reimbursed by a friend, colleague, or family member, Sentoo.me provides a simple and secure solution. Simply send the other person a payment request link, Sentoo.me ensures that you receive your money back quickly and securely. Getting Started with Sentoo.me in 4 Easy Steps:

1. Download the Sentoo.me app from

your preferred app store.

2. Follow the simple and fast steps to activate your account, linking it to your phone number.

3. Link your Sentoo.me account to your Aruba Bank account and wait for a 0.01 cent deposit in your Aruba Bank account. This deposit will contain an activation code, which you will use to complete the linking process.

4. Once confirmed, and your Sentoo.me account is successfully linked to your bank account, you can immediately start sending

payment requests!"At Aruba Bank, we are committed to simplifying the banking experience for our customers. The integration of the Aruba Bank App with Sentoo.me is yet another way we aim to bring innovative solutions that truly benefit our customers", according to Edseline Leer-Semeleer, Head of Retail Banking at Aruba Bank. Download the Sentoo.me App today and experience the convenience of requesting and receiving payments instantly! For more information, visit [www.arubabank.com/sentoo-me](http://www.arubabank.com/sentoo-me)



# CONTENTO DI TUR INVERSION Y PROYECTO HACI DEN CUIDO MEDICO

ORANJESTAD - Minister Oduber ta hopi contento, orguyoso y agradecido pa tur loke a wordo logra durante su 2 periodonan como minister encarga cu salud publico. Ora e la drenta den gobierno na aña 2017 como Minister di Salud e la hereda chaos y desaster. E la hereda un ministerio di salud sin vision, sin direccion, un AZV sin placa, inversionan no tawata tin niun inversion den cuidu, no tawata tin comunicacion entre stakeholders, dokternan di cas a wordo lubida, lista di espera tawata mas cu 1 aña largo y un proyecto di hospital sin guia y direccion. Un cuidu medico caminda studiantenan cu a studia medicina den region a wordo engaña cu nan lo haya nan Arubig. Tur cos a cambia danki na cambio di gobernacion y danki na minister Oduber cu un team hopi dinamico cu a percura pa atencion wordo duna di berdad na salud di nos hendenan. Minister Oduber a hiba un maneho concentra riba prevencion, haci inversionan den cuidu medico y percura pa mejora e calidad di cuidu y servicio.

- Awe danki na e maneho aki nos su yuinan di tera, cu a studia medicina den region, ta wordo reconoci y Aruba tin su propio registro di Arubig cual ta un logro historico.

- Di e forma aki a percura pa prome biaha den historia Aruba tin un plan nacional di prevencion. A lanta Healthy Lifestyle Center cu tin mas di 800 cliente activo unda a yuda cambia e clientenan estilo di bida pa uno saludabel. E Proyecto aki a yuda salba bida di hende y clientenan ta masha contento cu e centronan aki. Un Proyecto cu Minister Oduber no kier ni imagina cu e minister di salud nobo lo desea di stop pa asina yuda acomoda amigonan di AVP.

- Ministerio di Salud a



percura pa inverti miyones den mehoracion di calidad di cuidu y servicio. ImSan tin e miho centro di radio terapia den henter caribe. A percura pa 22 camanan na ImSan ta den uso. Na hospital a inverti den interventie cardiologie y recientemente den un hyperbaric chamber.

- Despues di mas di un decada dokternan di cas tin un acuerdo nobo cu AZV cu mas beneficio. A percura pa instrui AZV pa paga indexering na tur dunador di cuidu y mejora condicionan laboral pa specialistanan medico.

- Pa prome biaha den historia tin un “zorgakkoord” caminda tur partner den cuidu medico na Aruba ta alinean den e rumbo y direccion di cuidu medico na Aruba, esaki sigur ta algo historico.

- Listanan di espera a wordo baha danki cu a pone presupuesto pa yena vacaturanan di varios specialismonan.

Minister Oduber ta spera cu tur e proyectonan cu e la laga atras lo continua. Proyectonan manera:

- Zorgakkoord
- Plan nacional di prevencion
- Aruba Healthy Lifestyle Center
- Indexering pa dunadornan di cuidu (a pidi AZV pa percura pa pone fondonan)

- Mehoracion di condicionan pa specialistanan medico
- Arubig
- MOU cu LUMC
- MOU cu El Bosque

Un Proyecto cu ta canando y minister Oduber ta kere cu mester percura pa bira realidad ta e PET CT scan pa ImSan.

Minister Oduber ta sinti contento pa tur loke a ser logra y esaki ta danki na e team di Ministerio di Salud. Un team dinamico, un team profesional, un team cu conocimiento y experiencia cual Minister Oduberta hopi agradecido pa hunto a logra tur e exitonan aki. Tur loke a wordo haci y logra ta a base di teamwork y e team aki sa cuanto esfuerzo a wordo haci bao di hopi tension y presion pero cu un bunita resultado pa salud di nos hendenan. No tin nada mas bunita cu mira bek tur loke a wordo haci pa tin un comunidad

mas saludabel y cu un mihor cuidu y servicio.

Minister Oduber no por lubida e bon synergia entre Ministerio di Salud, DVG, IVA, HOH, ImSan, HAVA, ASHA, WGK, FEPO, FAVI y Asociacion di Laboratorionan. Ministerio di Salud a haya tambe tremendo ondersteuning di zorgeconoom Patrick Jeurissen como tambe Edwin Brugman cu a yuda enormemente.

“Un danki di curason na tur partnersnan pa tur boso sosten, cooperacion y bon synergia di trabou. Hunto nos a logra hopi cu ta yenami cu orguyo y satisfaccion pa sirbi mi pais di e manera cu mi a hacie. Cu un curason contento y gratitud grandi mi ta laga atras bunita proyectonan pa salud di nos hendenan cu mi ta spera cu sin excepcion mira continuidad. – Minister Dangui Oduber

## Clasificados

**SOLODIPUEBLO@GMAIL.COM**  
**CEL. 585 9500**



# A.T.A. TA GRADICI PA E RECONOCIMIENTO OTORGA DOR DI MINISTER PRESIDENT DEN CUADRO DI 5 AÑA DI COVID 19

“Ora mi corda riba e pandemia, mi ta corda riba un momento surreal den historia di mundo, cu a bira hopi real”, asina Ronella Croes, Chief Executive Officer na Aruba Tourism Authority (A.T.A.) ta corda cinco aña pasa, ora e pandemia a bati na nos porta y a drenta paden sin puntra y sin avisa. Nos no tabatin mucho tempo pa prepara, pero a mobilisa tur hende y a conta cu mentenan creativo pa pensa con maneha turismo y nos economia memey di tanto incertidumbre na nivel mundial.

E siman aki ta exactamente cinco aña cu a transcuri caba, despues cu economia mundial a paralisa pa motibo di un virus cu a cuminsa na China pero cu a contagia henter mundo. Awe, ora cu tur cos ta normalisa bek, ta bon pa para un rato keto y realisa cuanto esfuerso nos a hinca como pais, pa por a supera e momentonan ey. No tabata facil, pasobra mientras cu tabata enfoca riba aspeconan ecomomico, tabata un menasa serio di salud, den cual varios ciudadano a perde nan bida. Cu e dolor y tristesa aki, nos hendenan mester a sigui lucha y percura pa mantene mas tanto hende salud, mientras nos mester a convence mundo cu nos ta cla pa nan regresa.

## Tabata loer e di leu

Tabata na fin di aña 2019 caba a cuminsa monitorear e virus di China. Claro, a pensa cu sigur e ta asina leu di nos cu e lo no yega nos isla facil. Ya na januari y februari 2020, A.T.A. a produci un analisis di kico por ta impacto di e virus aki riba turismo di Aruba.

Riba un diadomingo, dia 8 di maart 2020, Crisis Management Office (CMO) a yama Ronella Croes pa

presenta mesora. E dia ey a detecta e prome persona cu a drenta Aruba for di China cu tabata un area di riesgo. “For di e dia y momento ey, mi tabata basicamente on call y na disposicion di pais Aruba pa cualkier eventualidad. Y manera Gobernador di Aruba a bisa mi ora cu el a yama mi: esaki no ta un sprint, e ta un marathon”, asina Ronella Croes a describi e comienso di e temporada largo di Covid na Aruba.

## E famoso “Friday the 13th”

Hopi lihe, despues di e diadomingo ey, pa ta exacto diabierna dia 13 di maart 2020 a cera frontera di nos isla. “Aruba a keda isola di mundo!”, cu riba su mes tabata un momento masha emocional. Bida a sigui y mester a atende aspectonan vital, manera ta Rubianonan cu a keda pega afo. Di otro banda, un otro ekipo a cuminsa prepara nos reapertura. No tabatin tempo di perde, pasobra Aruba ta depende di turismo.

## A.T.A. a activa mesora

Esey tabata momento cu A.T.A. mester a cambia e strategia di comunicacion di Aruba y a cuminsa uza “We are open for Happiness”. A defini mesora cu e reapertura di frontera lo ta den tres luna di tempo. A cuminsa habri fin di juni y pa Merca a habri dia 10 di juli. Y djey pa Latino America y sigui pa Europa.

## Aruba a lidera

“Cu orguyo mi por bisa cu Aruba a lidera y a presenta un winning formula cu a duna bon resultado”, di acuerdo cu Ronella Croes. Nos isla a sobresali y a hasta gana premio internacional pa ‘maneho efectivo y plan di recuperacion di nos destinacion despues di cera frontera’, ‘implementacion di e Plataforma digital di inmigracion’,



‘introduccion di un seguro special di Covid pa nos bishitantenan’ y pa e ‘colaboracion entre sector publico y priva pa recuperacion di turismo’.

## Mundo a uza Aruba como ehempel

Aruba a habri y bay contra e coriente y simplemente muestra liderazgo! Mientras cu henter mundo tabatin miedo di habri frontera pa e riesgo eminente cu e virus aki ta trece cu ne, nos a opta pa habri toch y mantene e isla bou control. No tabata facil y Gobierno di Aruba e demostra confiansa den e profesionalnan cu a conseha cu tabata OK pa habri numa, mientras cu mayoria entidad internacional a desconseha. Awe nan tur ta uza e ehempel y forma di traha di Aruba como e “new normal” na momento di un situacion asina.

## Aruba a sobresali

Despues di reapertura di frontera di juli te december 2020, e promedio di yegada pa tur bishitante, a baha cu 74% pa henter aña 2020. Imagina bo cu e cantidad di turista cu ta yega Aruba a baha cu 67%. Pero, cu determinacion y trabou den ekipo, eventualmente nos a mira un recuperacion lento pero stabiel, cu den aña 2021 e promedio di caida tabata -28%. Den aña 2022, mientras ainda a experencia un caida total di -2%, por a mira un recuperacion total desde april 2022 te cu awe. Comparando aña 2023 y 2024 cu 2019, ta nota un

aumento di 13% y 27%.

Ya caba a stop di compara aña 2024 cu aña 2019, mirando cu na aña 2023 ya caba a marca un recuperacion total. Comparando aña 2024 cu 2023, Aruba a experencia un aumento di 12.8% den yegada. A pesar di e pandemia di COVID-19, e Guest Experience Index di Aruba a keda stabiel rond di 9.1, indicando un grado halto di satisfaccion di e huespednan desde juli 2020 te december 2024.

Industria crucero a dura un poco mas

Pa loke ta e industria crucero, esey a tuma basta tempo mas pa recupera, compara cu aviacion general. Desde cu a cera frontera na maart 2020, a logra habri bek te na juni 2021. Na aña 2023, tres aña despues di e pandemia, e ora numa nos a recupera 98% y tabata aña pasa cu a logra recupera completo y hasta crece den cifra.

Ban traha dam warda awa

E pandemia a siña nos cu mester ta prepara pa tipo di scenarionan asina, specialmente ora cu ta for di nos control. E lesnan cu nos a siña ta valioso pa por tin un miho idea con pa maneha den un situacion di emergencia. Si tin algo cu nos a demostra como pais, cu na momento cu nos economia y turismo ta den wega, cu no tin distincion di color politico ni diferencia den sector publico of priva, nos tur como Rubiano ta bira manga di camisa y traha.



# Un momento historico pa Komite Olimpico Internacional

Sra. Kirsty Coventry a keda eligi como e di dies presidente di International Olympic Committee

Awe tardi na Costa Navarino na Grecia, e eleccion pa un presidente

nobo di "International Olympic Committee" (IOC) a tuma luga. Un total di 7 candidato a postula nan mes, di cual Sra. Kirsty Coventry di Zimbabwe a keda eligi como e di dies presidente di e Komite Olimpico

Internacional.

Esaki ta un momento historico, como e lo ta e prome presidente femenino y di e continente Africano pa wordo nombra como presidente di IOC.

Sra. Kirsty Coventry ta un campeon Olimpico cu 7 medaya en total, cu ta hacie e atleta Olimpico mas decora di e continente di Africa, ademas di a logra diferente record mundial den natacion.

Den su carera despues di natacion, e la cambia di profesion y a drenta politica, unda cu awendia e ta e minister di Hubentud, Deporte, Arte y Recreacion di su pais Zimbabwe.

Nos di Komite Olimpico Arubano ta felicita Sra.



Coventry cu e nombracion historico y ta desea su persona tur clase di exito cu e reto nobo aki.

Parlamentario Shailiny Tromp-Lee:

## E bon maneho di Gabinete Wever-Croes ta haci cu awor tin placa pa duna bek na pueblo

Gabinete Eman-Croes tin e privilegio di cuminsa gobernacion cu placa den caha compara cu con nan a laga e caha atras na 2017

Diabierna 7 di maart 2025, porfin nos a inicia cu tratamento di presupuesto di Pais Aruba pa aña 2025. Lastimamente na un manera dictatorial esaki a keda geschors te cu previo aviso. Sigur mirando e situacion di traspaso di Gabinete Wever-Croes pa e Gabinete Eman-Croes (dos cabes) mi ta haya necesario pa enfatisa e hecho cu Gabinete Wever-Croes desde un principio a traha duro pa yega na un disciplina presupuestario necesario y a sa di maneha e pais aki responsabelmente. Ya pa di 3 aña consecutivo nan ta entrega presupuesto di pais Aruba na tempo y mesun importante nan ta cumpli cu tur normanan stipula pa ley!

Poco poco e ciclo presupuestario lo keda optimalisa y nos por cuminsa draai manera mester ta. Nos no ta unda nos mester ta pero sigur nos ta riba un bon y mihor caminda. Pesey mes mi ta spera cu e Gobierno nobo sigui mantene e disciplina presupuestario aki caminda ta presenta presupuesto na tempo, ta informa Parlamento mediante voor- y najaarsnota di desaroyonan y ta pidi aprobacion pa cambio na tempo, y caminda tussentijds, esta despues di e prome 6 luna di aña, Gobierno ta bin duna cuenta na parlamento.

Nos mester preveni situacionnan cu a tuma lugar entre 2010 y 2016 caminda nos a conoce hopi situacion caminda e budgetrecht di Parlamento a keda mina, a

crea deficitnan astronomico cu Parlamento achteraf tabata aproba. For di Rapportnan di ARA sigur nos por conclui cu hopi cos a bay robes durante e periodo ey sin cu Parlamento tabata informa of involucra. Proyectonan cu a expone pais Aruba na hopi riesgo, cu no a keda cubri responsabelmente y caminda cu ARA a conclui cu tabatin hopi error a keda constata. Proyectonan caminda hopi documentonan ta incompleto y sigur e parti mas crucial ta cu Gobierno di Mike Eman no a bisa ta con pueblo lo bay paganan.

Nos no por drecha mas loke a bay robes, pero si nos tin den nos man pa preveni cu e mesun erornan di Gabinete Mike Eman I y II ta keda cometi den futuro. Erornan cu a demsotra di tin consecucionan drastico pa nos pais y nos hendenan pa decadas. Pesey mes ta hopi importante pa Parlamento percura cu Gobierno ta sigui traha segun e recomendacionnan di ARA pa asina nos por percura pa enberdad nos por cumpli cu nos trabou y representa nos pueblo dignamente. Alabes nos mester keda controla cu nos finanzas ta keda maneha responsabelmente y cu e espacio financiero crea pa



Gabinete Wever-Croes keda uza responsabelmente y den balans cu e necesidadnan di pueblo.

Gabinete Wever-Croes sigur a percura pa hiba un maneho responsabel cu awe a crea e espacio financiero necesario pa por cuminsa duna bek na pueblo y aunke siendo demisionario asina mes a cuminsa duna bek den e margen di loke ta posibel. Mi kier termina subrayando cu ta danki na e espacio finaciero crea pa Gabinete Wever-Croes, Gobierno Eman-Croes tin placa pa inverti y por duna bek na pueblo. Contrario na con nan a laga e caha atras na 2017!



# Stacy Greaux ta Celebra 10 Aña den Servicio cu Botica di Servicio

Botica di Servicio ta sumamente contento di reconoce e dedicacion y expertise di Stacy Greaux, kende ta forma un parti integral di nos team desde 2015.

Como Farmaseutische Manager, Stacy ta hunga un rol vital den sigura cu tur cos den e parti operacional ta constantemente yegha na e rekisitonan di HKZ (Harmonisatie Kwaliteitsbeoordeling in de Zorgsector).

Aunke Stacy ta bai rond tur e localidadnan di Botica di Servicio, e ta mas na Botica Maria.

Su responsabilidadnan ta extende mas eyan di expectativa—Stacy ta instrumental den streamline e procesonan entre tur e localidadnan y ta activamente contribui den e desaroyo di proyectonan crucial, manera Diabetes Post y revision di medicamento.

E compromiso di Stacy pa excelencia ta sigura cu Botica di Servicio por



provee e miho calidad di servicio y cuido pa e salud y bienestar di e comunidad.

Botica di Servicio kier

a extende un palabra di gratitud grandi na Stacy pa su dedicacion constante y esfuerzo grandi den su trabou.

Tocante Botica di Servicio Botica di Servicio ta un grupo di farmacia cu 4 localidadnan riba e isla di Aruba. Durante e añanan, Botica di Servicio

a obtene un grupo di profesionalnan den e area di salubridad hunto cu empleadonan capacita pa provee e miho servicio riba e isla di Aruba.

## Wikipedia on Aruba cu tayer di Wikimedia Commons na Biblioteca San Nicolas

San Nicolas Aruba - Dia 27 di maart 2025, wikipedia on Aruba lo organisa un tayer gratis pa tur persona cu ta interesa pa upload nan potret di Carnaval riba Wikimedia Commons.

E plataforma aki ta un di e diferente database digital di Wikimedia foundation unda materialnan visual por wordo agrega fasilmente pa

facilita conocimiento pero tambe yuda engradece contenido visual riba Wikipedia, unda informacion ta wordo comparti cu un audiencia mundial. Ta falta articulonnan educativo tocante Carnaval di Aruba ariba Wikipedia PAP. Tur informacion ariba e pagina aki ta na

Papiamentu/o i ta wordo maneha completamente pa boluntarionan. E meta ta pa crece e comunidad di boluntario ariba Wikipedia PAP i engrandece informacion di nos herencia y cultura ariba e plataforma. Tur e plataforma abou di Wikimedia Foundation ta accesibel y habri pa tur hende! Locual cu ta hasi cu tur hende por aporta fasilmente na crea, añadi, coregi, comparti y traduci informacion relevante i valido. E tayer Wikimedia Commons ta tuma lugar dia 27 di maart na Biblioteca Nacional San

Nicolas (piso tres) lo enfoca riba agrega potret di Carnaval di Aruba riba Wikimedia Commons. Pero no ta limita na esaki. Tur persona cu ta interesa di agrega potret relevante cu por yuda habri conocimiento di Aruba su Herencia of Cultura por uni den e tayer. Porta lo ta habri desde 4:30PM, ta cuminsa cu un introduccion cortico di e proyecto di Wikipedia on Aruba presenta pa e Wikimedians in Residence (Jeanelij Quandt y Ricardo Arends) pa despues sigui cu e tayer

Wikimedia Commons entre 5:30 - 6:30PM. Biblioteca San Nicolas ta sera su porta 7:00PM.

Ta hasi un yamada na tur esnan cu lo uni den e tayer pa registra cu e link akibou. Tambe pa crea un cuenta riba Wikimedia Commons cu lo facilita e proceso durante e tayer. Corda bini cu bo laptop celular! Pa mas informacion por tuma contacto cu nos na +297 699 3034 / +297 699 3032 of [wikipediaonaruba@wikimedia.nl](mailto:wikipediaonaruba@wikimedia.nl) Registra akianan <https://forms.gle/M3CBhioXueAegqv2A>



# ARUBA BANK CU DONACION SPECIAL DI AWG 100,000 NA FUNDACION SALUD MENTAL

## RespaldoPa fortalece Cuido Mental na Aruba

Oranjestad, 21 di maart, 2025 – Aruba Bank ta honra di anuncia su compromiso continuo cu e bienestar di nos comunidad, cu un donacion di AWG 100,000 na Fundacion Salud Mental Aruba – Respaldo. E donacion aki ta un paso importante pa fortalece e sosten y cuido mental riba nos isla.

Respaldo ta realiza un trabou fundamental cu hopi pasenshi y dedicacion pa yuda personanan cu mester di sosten mental. Pa facilita nan trabou, Aruba Bank a entrega oficialmente dos vehiculo; un bus pa transporta clientenan na terapia y actividadnan cu ta mehora nan bienestar y un vehiculo pa bishita di cas, permitiendo cu mas di 250 pashent por



sigui haya e tratamento continuo cu nan merese.

“Nos ta convenci cu un

















comunidad fuerte ta cuminsa cu un mente saludabel. Respaldo ta cumpli un rol vital den e sosten mental di Aruba y nos ta orguyoso di por yuda nan sigui traha cu amor y entrega,” segun

Edseline Leer - Semeleer, Head of Retail Banking durante e entrega oficial.

Aruba Bank ta spera cu e donacion aki lo tin un impacto positivo den bida di hopi hende y lo

duna Respaldo e sosten necesario pa sigui ofreci cuido di calidad.

Masha danki na Fundacion Respaldo y tur esnan cu ta traha pa un futuro mas saludabel pa Aruba.

<div></div> <div>Paardenbaaistraat 10, Oranjestad, Aruba Tel.: (297) 525 - 7555 www.lottoaruba.com</div> <div>Resultado: Sorteo di Anochi - March 20, 2025</div>		
<div></div> <div>Sorteo # 8500</div> <div>1814</div> <div>7338</div> <div>9484</div> <div></div> <div>X2</div> <div></div> <div>Sorteo # 7544</div> <div>9393</div> <div></div> <div>X2</div> <div></div> <div>Sorteo # 2249</div> <div>8613</div> <div></div> <div>Sorteo # 6303</div> <div>1178</div> <div>Virgo</div> <div></div> <div>Sorteo # 1233</div> <div>022</div> <div></div> <div>FP</div>	<div></div> <div>Sorteo # 2577</div> <div>0 x Jackpot</div> <div>0 x Match 4+</div> <div>8 x Match 4</div> <div>88 x Afl. 12,00</div> <div></div> <div>Sorteo # 6774</div> <div>0 x Jackpot</div> <div>8 x Match 4</div> <div>142 x Afl. 8,00</div> <div></div> <div>Sorteo #</div> <div>0 x Jackpot</div> <div>0 x match 4</div> <div>0 x Afl. 500,00</div> <div>0 x Afl. 50,00</div> <div>0 x Afl. 15,00</div> <div></div> <div>Sorteo #</div>	<div>06-13-26-31-34</div> <div>Joker 24 Letter D</div> <div>Proximo Jackpot</div> <div>210.000,-</div> <div>04-10-15-19-28</div> <div>Proximo Jackpot</div> <div>51.000,-</div> <div>300.000,-</div> <div>Afl. 420.000,-</div> <div></div>




# BARCA A “EDGE” REAL DEN E PROME “EL CLASICO DOMINO CHALLENGE”!

Calabas/Kudawecha - Shonnan fanatico di domino, si bo no tabata presente diasabra 15 di maart n'e unico y mundialmente famoso Domino Square Garden pa presencia e prome “EL CLASICO DOMINO CHALLENGE” anto b'a perde un sambombaso di encuentro cu a caba pio cu volcan! E tension e anochi ey a crece pio cu e cero na caminda pa colony na Sant'i Patia! Pa cuminsa, un conocido comerciante den ekipo electronico, ora el a wak kendenan ta den su team original, esta Team Real, a dicidi sin blink dos biaha pa bula cura pio cu politico y join Team Barca! Aki Capitan di Team Real, Tony “The Tiger” Trimon, su fuse a bula prome cu wega a ni sikiera start! Ya aki e prome sla a cay pa Team Real, pero e diosnan di domino tabata tin mas cos trama pa Team Real cu ni Hollywood por pensa!

Team Barca ta sali brabo bay dilanti cu 8-4, pero Team Real ta haci un comeback sensacional y ta piki 7 wega tras di otro pa drenta halftime cu bentaha di 8-11! Despues di a disfruta di e pasapalonan gratis den halftime, Team Real ta extende nan bentaha te na 16-11! Cos ta hot shonnan, un rosea di victoria ta core den Team Real y capitan Tony Trimon ya ta cuminsa frega man y lembe bigote! Sinembargo, capitan di Team Barca, Marc Yazagaray, ta saca su popchi di voodoo estilo “Vinicius” y pocopoco ta cuminsa manda feneta



den su “Vuduicius”. Team Barca ta cuminsa piki punta, mientras cu Team Real ta hayando e sensacion cu nan 4x4 a cuminsa chok den lodo! Sensacionalmente e wega ta empata na 20-20! A saca e “VAR-Chino” for di cushina pa nada scapa wowo di referee Rudi, y den pito, n'e ultimo “fluitsignaal”, Jadimir y Glenn di Team Barca ta anota e ultimo gol pa pone Team Barca “edge” Team Real cu score sensacional di 21-20! E sla aki a dal Team Real asina duro cu e “Vinicius” di Team Real su cabes a tilt y a dicidi cu ta ora pa regla cos a lo crioyo y su conopinan a cuminsa zwaai manera helicopter sin rabo! Ora a busca e “VAR-Chino” pa “rewind” cos pa wak ta ken a pusha ken, a ripara cu e VAR ta “missing in action” y scondi bou mesa! Sinembargo, ambos ekipo a zorg mes ora p'e bululu a calma y tur hende por sigui gosa dje tremendo ambiente y recorda e momento historico caminda Lito Kelly di Team Barca a pasa capitan di Team



## EL CLASICO DOMINO CHALLENGE

Real Tony “The Tiger” Trimon un sapato mas blanco cu sneeuw witje!

All in all, un tremendo encuentro y keda pendiente pasobra

e revancha ya ta na caminda!



# FORTALEZA PA FAMILIA

Scirbi pa Pastor Marcel Balootje.

## CONFIANSA DEN DIOS TA DETERMINA TUR COS

Ora David tabata bay bringa contra Goliath, tabatin opinion, cu a sali di David su propio ruman grandi, y tambe di Rey Saul, pero David su confianza den Dios a determina cu e lo ta e vencedor.

Awendia tin hopi hende kier ta consehero, pero ta existi e posibilidad peligroso ora un hende ta conseha bo, y e mes ta desea pa cos no bay bo bon.

Pasobra egoismo ta pone ciego mira, y jaloersheid ta severo, e ora ey bo no ta bay keda cla pasobra malisia a drenta.

Y diabel gusta drama y fama, e gusta asunto di cambia palabra, y tene hende na linja y si bo no sali for di su gara, bo keda ta biba den duda. Pesey nos mester deposita nos confianza den Dios y no den hende.

Temor pa hende ta pone un trampa,ma esun cu confia den Senyor lo ta halsa.( Proverbionan 29:25).

Instrui un mucha den e caminda cu e mester cana,y hasta ora cu e bira bieuw e lo no aparta su mes for di dje.

Nos hubentud ta draai hopi riba opinion di hende, kico hende lo pensa.bisa,of papia, pesey ta nos deber pa haci tur locual ta posibel pa nan confianza aumenta den Dios.

Pasobra ora un hende su confianza ta den Dios, e lo declara algo y esey lo sosode ( Job 22;27-28), pasobra e boluntad di Dios ta na prome lugar den su bida, y esey ta tur locual cu e mester.

Un bida constante di oracion, ta aumenta nos confianza den Dios, algo poderoso, pasobra confianza den Dios, no por wordo midi, pasobra

Dios ta contento ora nos tin confianza den dj'E, pa asina E ricibi tur Honor y Gloria, y demostra cu e ta Dios.

Pesey su palabra ta bisa cu: Ora bo pasa den candela e vlamnan lo no kima bo. Y ora bo pasa den awa, lo bo no hoga, pasobra Dios mes lo pasa hunto cu bo pasobra bo confianza ta den Dios.

Y caminda hende tin confianza den Dios, Dios su presencia tey tur momento, pasobra Dios no ta bandona esnan cu tin confianza den dj'E. ( Isaias 26:3-4).

Pasobra ta fabor di hende mi ta busca awor,of di Dios? Of ta hende mi ta trata di agrada? Si ainda ta hende mi tabata trata di agrada, lo mi no tabata un sirbido di Cristo.( Galationan 1:10).

Den tur cos nos mester laga boluntad di Dios, y confianza den Dios determina tur cos, y no haci nada riba nos propio forsa, tur cos cu nos ta bay cuminsa, nos tin cu hinca Dios aden for di prome dia, y no laga ora cos pega e

ora ey nos ta bay busca Dios.

E palabra ta ordena nos pa para fuerte bisando: Boso a wordo cumpra pa un prijs, no bira esclavo di hende. Rumannan, laga cada hende keda dilanti di Dios, den e condicion den cual e a wordo yama.( 1 Corintionan 7:23-24)

Ta difcil pa nos por compronde, con un hende por laga su mes wordo usa pa maldad, pa inmoralidad,sabiendo cu tur cos ta na su desventaha.

Un hoben mester compronde cu esun cu ta ofrece arma y droga, no ta respeta su bida, no tin consenshi, no tin balor di ser humano, no tin cuenta cu su futuro, y mas ainda un persona asina no tin e amor di Dios den su curason.

Huy for di opinion di hende negativo,y deposita bo confianza completamente den Dios.

No tin nada mas bunita cu confia den Dios.

# SUDOKU

	3		2		9		7	
9			4	1	3			8
		1		7		3		
7	1			4			9	5
	8	6	9		7	4	3	
5	9			2			8	7
		8		6		9		
6			1	3	2			4
	4		8		5		6	

		6	7		4	9		
	5			6			8	
2								5
3								1
1								2
	8						3	
		7				6		
			3		9			
				8				

	7			6				9
6			5				8	
		4				7		
	3				6			
2				5				8
			4				1	
		3				4		
	2				7			3
1				8			2	

# Clasificados





**SOLODIPUEBLO@GMAIL.COM**

**CEL.585 9500**

SOLO Di Pueblo





# Obituario



Publica serka nos anuncio di fayecimento di bo ser kerí.  
Nos tin 2 pakete pa ofrese;

Pakete 1: Anuncio di fayecimento te dia cu e defunto  
ser dera  
Gradicimento y invitashon pa misa pa 3 dia Afl 250,00

Pakete 2: Anuncio di fayecimento te dia cu e defunto  
ser dera  
Gradicimento y invitashon pa misa pa 3 dia

Na Canal 22 1x prome cu Noticiero 22 Afl 400,00

**Pa mas informashon por tuma contacto cu oficina na**  
**585-9500 of na 741-4554**

# Clasificados






**SOLODIPUEBLO@GMAIL.COM**  
**CEL. 585 9500**



**Pa Orashion prome  
cu entierro  
ESTA VIGILIA  
y orashion despues  
di entierro esta  
OCHO DIA  
por jama  
Atanasio Bremono**



**Cel. 569 2763  
of 568 6141**

**SEMPER NA BO ORDO**

“Señor ta mi wardador, mi’n tin falta di nada. Den cunucu di yerbe berde e ta ponemi sosega. E ta hibami na awa trankil, Pa mi bolbe haña forsa”. Salmo: 23

Cu profundo sentimento, pero conforme cu Dios su boluntad  
a bay sosega den braza di señor:

## Sra. Margriet Jansen-Laclé

(Chichi)  
12 december 1946 - 18 maart 2025  
Vda. di †Edwin Jansen  
Yiu di †Maria y †Doei Laclé-Loefstok  
Directiva di Kawara



Na number di:  
Su yiunan:  
Gina y Dennis Thijzen-Jansen  
Gino Jansen

Nietanan stima:  
Genisha Thijzen y Bryan Figaroa  
Jasmira Thijzen

Su rumannan:  
Frenk y Evelina Laclé-Figaroa  
Emely y Victor Alberts-Laclé  
Demas rumannan den felis memoria

Su sua y cuñanan:  
Sra. Vda. Mena Laclé-Geerman  
Sra. Vda. Winnie Webb-Jansen  
Sr. Vdo. Richie Jansen y famia  
Greta y Edgard Tromp-Jansen y famia  
Yolanda y Ismael Wolter-Jansen y famia  
Roy y Miriam Jansen-Figaroa y famia  
Lourdes y Ruben Giel-Jansen  
Swinda y Eddy Tromp-Laclé y famia

Su sobrino y sobrinanan:  
Raymond Laclé y Eldrith Henriquez y famia, Esther Laclé y Richenel Maduro y famia, Harold Laclé y famia, Eric Laclé y famia, Ermond Laclé, Sheldon Laclé y Angie Faro y famia, Sherwin Laclé, Ken Laclé y Yenni Moreno y famia, Jo-Anne Alberts y Joshua Gomez y famia, Michael Alberts, Maritsa Danja, Martha Danja y Carlos Danja

Consuegra: Sra. Vda. Casimira Thijzen-Boekhoudt  
Su amiganan: Mena Lumenier, Ina de Mey, Lourdes Figaroa  
Na number di tur su ihanan, comer y compernan, primo(a)nan, su bon bisñanan y Directiva y miembronan di Fundacion Kawara

Demas famia:  
Jansen, Laclé, Thijzen, Loopstok, Loefstop, Croes, Geerman, Figaroa, Alberts, Danja, Leo, Tromp, Yarzagaray, Rijke, Webb, Giel, Wolter y Boekhoudt.

Na lugar di flor of krans lo aprecia un donacion pa un bon causa na Hospice Atardi, lo tin un box disponible.

Nos disculpa si den tristeza nos por a lubida cualkier famia/conocir.

Ta invita pa e acto di entierro cu lo tuma lugar dialuna 24 di maart 2025 na Misa Santa Filomena na Paradera di 1or pm pa 4or pm. Despues lo sali pa Santana Catolico Pastoor Kranwinkel na Paradera.

Nos ta lamenta cu despues di entierro nos no ta ricibi bishita di condolencia na cas.



# ADDONSITO CROES ORGUYOSO DI THE PRIME MINISTERS

Como secretario di Stichting Klein Aruba (SKA), Addonsito Croes a expresa e orguyo cu e ta sinti di por a traha activo cu Omar Harms, Erin Croes y Jeng Leon, WOLFF STUDIO & CO. studio riba e realisacion di e documentario The Prime Ministers.

Tawata un aña di bon estructura, estudio, disciplina y sigur placer cu a trece e producto historico aki cu e publico di 475 invitado den Cas di Cultura a aplaudi sin fin. Den e presentacion The Prime Ministers, ningun momento a sinti e concurrencia custumbra di e fanaticonan di partido Mep of Avp.



Bunita tawata pa scucha y mira e lidernan Henny Eman, Nelson Oduber, Mike Eman y Evelyn Wever Croes ser aprecia pa nan parti humano.

Na number di cada un cu a haci e produccion aki posibel, un danki grandi. Omar Harms, cu e idea unico aki, a sa di uni tur hende den e sala

grandi yena cu harmonia.

“Pabien, mi ruman sin dolor Omar Harms pa bo amistad y confiansa; bo a logra algo nunca antes mira na Aruba. Stichting Klein Aruba ta orguyoso di a marca historia di nivel halto, hunto cu bo”.

23 di maart ’25 nos lo ripiti e documentario / pelicula aki den Cas di Cultura pa 6:00 pm. Lo ta bendiendo carchi

na porta pa 5:10 pm. Grant Thorton, HCC, APA nv, Potretnan ta cortesia di Danki UNOCA, Cede Aruba, AAA, Magic 96.5 fm, CMB y 24ora.com y Juan Luis di ATA, Compra nv, SETAR, Prensa di Aruba. notsochubby productions.



# Oracion di dia

## Un feliz dia bendiciona yena cu gracia di Dios

”Lo Bo ta sacerdote pa semper na e mesun manera cu Melkisedec.”  
(Hebreunan 7, 17b)

Ruman aki nos ta mira Hesus cu e titulo Sacerdote/Rey di Husticia pa semper, bunita titulo pa Hesus aunke Hesus no mester di ningun introduccion of titulo paso E ta Dios y Dios ta Amor. Asina mes den Hesus nos por experencia Amor, E Amor Unico cu nos tur ta anhela consciente y inconscientemente nos tur ta anhela di experencia E Amor di Dios.

Ta dificil pa esey sosode? Ta bon pa nos sa cu tur cos ta depende di con habri nos curason ta pa Hesus y con nos ta permiti Spirito Santo move den nos.

Diadomingo nos a scucha cu nos tin e donnan y awor ta keda nos nada mas cu resa y pidi Spirito Santo habri nos curason pa nos experencia y pone e donnan den practica y asina acepta y cumpli cu Dios su boluntad den nos bida y nos biba!

Oracion:Hesus mare nos tur por reconece cu Abo ta nos Rey di Husticia y acerca Bo curason misericordioso pa nos salvacion.

Amen